



*Jumat, 23 Februari 2024*

**Ogen: Perbahanen Rasul 9:36a**



**Belkih Beru-beru**



**E**rbahan gelar anak la kepe menukah. Sebab nuate gelar e jadi toto segelah bagelah jadi man anak sinigelarken gelar e. E maka labo lit orangtua erbahan gelar si la mehuli man anakna. Tapi mawen i bas perdalinen geluh megati la terbaba kita gelar si mehuli. Mejile gelarta tapi si la mejile lagu langkahta, merim gelarta tapi si nggesuh perbahanen. Ntah i bas pustaka si badia nari gelarta tapi carata nggeluh si simbak rusur ajaren si lit bas Pustaka e nari.

Dorkas, ntah pe Tabitha, ia sekalak diberu si mehuli. Gelarna sembaba ras perbahanenna, belkih beru-beru. Belkih beru-beru e me sada rubia-rubia si mejile dagingna, permela dengen nahe-nahena lincah, megegeh. Bas paksa belkih beru-beru e natang tuah, kenca nggo metua bertinna lawes ia kuingan mesawang guna mupusken anakna je. Alu lemah lembut ipekena-kenana anakna ras ijagaina seh kerina anakna e ngasup mpekena dirina jine. Bagi belkih beru-beru si tuhu-tuhu mperdiateken anakna, bage pe Tabitha ntah pe Dorkas i bas kegeluhenna, tuhu-tuhu mediate ia nandangi enterem diberu balu-balu dengen nggit Tabitha makeken talentana ras duitna guna erbahan baju man diberu-diberu si la ergegeh isekewetna. Adi Tabitha, nggeluh ia sue ras gelarna. I ja nari nge kengasupenna? Tek kita sabap ia kalak sierkiniteken man Tuhan, sekalak si tutus i bas perpulungen Tuhan i Jope, maka gegehna erbahan mehuli e bas Tuhan nari.

Moria, e gelar si mejile. I bas pustaka si badia e delengingan Abraham nehken persembahen man Tuhan. Marilah sipakeken dirinta bagi Dorkas, mereken dirinta jadi persembahen alu mereken talenta ras kinilitenna nampati sekelewetta. Sabap gelarta enggo tersurat i bas Tuhan selaku anakNa, siikelengiNa.